

Topaic 11: Éadaí agus Siopadóireacht

Feidhmeanna

San aonad seo foghlaimoidh an rang conas:

- | | |
|------|--|
| 11.1 | ~ cineálacha éagsúla éadaí a ainmniú |
| 11.2 | ~ eolas a lorg agus a thabhairt faoi dhath |
| 11.3 | ~ tuairimí a chur in iúl |
| 11.4 | ~ tuairimí a lorg is a thabhairt |
| 11.5 | ~ idirdhealú a dhéanamh idir éadaí éagsúla |
| 11.6 | ~ fiafraí faoi chostas agus eolas a thabhairt faoi chostas |

An ghramadach

San aonad seo foghlaimoidh an rang:

- | |
|--|
| <ul style="list-style-type: none"> • Aidiachtaí san uatha agus san iolra: <i>geansaí deas, léine bhúí, bróga dubha</i> • Na réimíreanna ró agus an: <i>rómhór, ró-éadrom, an-deas</i> • Uimhreacha: <i>deich euro, fiche euro, tríocha euro... céad euro</i> • Aidiachtaí taispeántacha: <i>seo, sin</i> |
|--|

Stór focal:

San aonad seo foghlaimoidh an rang:

<p>Cineálacha éadaí: <i>geansaí, bríste, léine, t-léine, fo-éadaí, sciorta, gúna, culaith, stocaí, bróga, cóta, hata, buataisí, blús</i></p> <p>Dathanna: <i>dubh, bán, dearg, buí, gorm, glas, donn, dath oráiste, bándearg</i></p> <p>Aidiachtaí: <i>deas, saor, daor, beag, mór, éadrom, dorcha</i></p>
--

Beidh an foghlaimoir in ann...

Labhairt	Na príomhbhaill éadaigh agus na príomhdathanna a ainmniú. tuairimí an-simplí a chur in iúl faoi éadaí. Ceist a chur faoi chostas.
Cluastuisicint	Cur síos an-simplí a bhaineann le baill éadaigh, an dath orthu agus an costas a bhaineann leo a thuiscint.
Léamhthuisicint	Ainmneacha na bpríomhbhall éadaigh agus na ndathanna a thuiscint. Praghsanna simplí a thuiscint.

11.1 Ag ainmniú cineálacha éagsúla éadaí

(A) Múin ainmneacha na gcineálacha éagsúla éadaí don rang.



Gníomhaíocht 11.1(A): Cineálacha éadaí: Cluastuisicint agus Caint

Réamhullmhúchán:

- Déan cóip de **Bhileog 11.1(A): Cineálacha éadaí** le húsáid ar an osteilgeoir nó déan cóip do gach duine sa rang.

Gníomhaíocht:

- Déan cur síos don rang ar a bhfuil á gcaitheamh ag an triúr ar an mbileog mar seo a leanas: *Tá léine agus bríste ar Cholm. Tá geansaí air freisin agus bróga.* agus araile.
- Déan fuaimniú an fhoclóra a chleachtadh leis an rang go dtí go bhfuil siad compordach, muiníneach as cur síos a dhéanamh ar a bhfuil á gcaitheamh ag na daoine sna pictiúir.
- Iarr ar dhaoine éagsúla sa rang cur síos a dhéanamh ar a bhfuil á gcaitheamh ag an triúr ar an mbileog.
- Iarr ar dhaoine sa rang cur síos a dhéanamh ar a bhfuil á gcaitheamh acu féin: mar shampla: *Tá sciorta agus blús orm agus tá bróga orm.*



Gníomhaíocht 11.1(B): Cad atá orm?: Cluastuisceint

Gníomhaíocht:

- Tabhair cóip de **Bhileog 11.1(B): Cad atá orm?** do gach duine sa rang agus abair leo go mbeidh siad ag éisteacht le Deirdre, Sharon agus Philip ag cur síos ar na héadaí atá á gcaitheamh acu.
- Míneigh dóibh go mbaintear úsáid as an réamhfhocal *ar* nuair a bhítear ag cur síos ar na héadaí atá ar dhuine. Féach na samplaí thíos:

Tá sciorta agus blús orm.

Tá culaith air.

Tá gúna uirthi.

- Anois, caithfidh na foghlaimeoirí tic a chur in aice leis an bpictiúr den bhall éadaigh cuí i ngach cás.
- Ceartaigh an ghníomhaíocht trí iarraidh ar fhoghlaimeoirí éagsúla cur síos ar na héadaí is maith leis na cainteoirí difriúla.

(C) Na cineálacha siopaí

- Múin an foclóir don rang chun cur síos ar na siopaí éagsúla:

siopa éadaí, siopa bróg, siopa fo-éadaí, siopa hataí, cúntóir siopa

11.2 Ag lorg agus ag tabhairt eolais faoi dhathanna

- Múin na príomhdhathanna don rang:

gorm, bán, dubh, dearg, donn, glas, oráiste, bándearg, buí



Gníomhaíocht 11.2: Na dathanna: Caint Réamhullmhúchán:

- Bíodh cúpla cart déanta agat chun na príomhdhathanna a léiriú.
- Chun é seo a dhéanamh is féidir leat focal an datha a scríobh le peann a bhfuil an dath sin air nó is féidir leat píosaí páipéir dhaite de na príomhdhathanna a ghreamú le cairt agus ainmneacha na ndathanna a scríobh in aice leo nó is féidir leat roth dathanna a dhearadh agus ainmneacha na ndathanna a scríobh ar imeall an rotha.

Gníomhaíocht:

- Déan cleachtadh ar na dathanna leis an rang trí cheist a chur ar an rang: *Cén dath é seo?*
- Ansin cuir ceist ar dhaoine éagsúla sa rang: *Cén dath atá ar do gheansaí? ar do bhróga?* agus araile.

11.3 Ag cur tuairimí in iúl

(A) Ag déanamh cur síos ar éadaí

- Múin roinnt aidiachtaí don rang chun cur síos a dhéanamh ar éadaí nó ar bhróga:

mór, beag, fada, gearr, deas, álainn/galánta, maith, ard, íseal

- Samplaí:

*bróga arda, bróga ísle,
cóta gearr/fada, cóta mór (mínigh gurb é cóta báistí is brí leis seo, de ghnáth)
sciorta gearr/fada,
blús deas
culaith lainn agus araile.*

(B) Ag cur tuairimí in iúl faoi éadaí

- Iarr ar an rang tuairimí a chur in iúl faoi bhall éadaigh ar bith ar **Bhileog 11.1(A): Cineálacha éadaí.**
- Ba cheart go mbeidís in ann tuairimí mar seo a thabhairt duit:

*Is maith liom an gúna.
Ní maith liom an hata.
Is fuath liom an chulaith.
Is breá liom an blús.*

(C) Na réimíreanna ‘ró’ agus ‘an-’.

- Cuir na réimíreanna ‘ró’ agus ‘an-’ a d’fhoghlaim siad faoi **Thopaic 7: Buanna agus Scileanna** i gcuimhne don rang.
- Abair leo éisteacht leat agus tú ag rá:

*mór rómhór an-mhór
beag róbheag an-bheag
fada rófhada an-fhada*

- Cad a thugann siad faoi deara?
- Cuireann na réimíreanna seo séimhiú ar thúschonsan na haidiachta.

- Abair leo éisteacht leat agus tú ag rá:

<i>deas</i>	<i>ródheas</i>	<i>an-deas</i>
<i>ard</i>	<i>ró-ard</i>	<i>an-ard</i>
<i>íseal</i>	<i>ró-íseal</i>	<i>an-íseal</i>
<i>saor</i>	<i>róshaor</i>	<i>an-saor</i>

- Cad a thugann siad faoi deara?
- Ní chuireann *an-* séimhiú ar aidiacht a thosaíonn le *d*, *t*, *s*.
- Ní féidir séimhiú a chur ar ghuta ar ndóigh, mar sin ní bhíonn aon athrú tar éis na réimíreanna seo ar aidiacht a thosaíonn le guta.



Gníomhaíocht 11.3(C): Na réimíreanna 'ró' agus 'an-': Scríbhneoireacht

Gníomhaíocht:

- Tabhair cóip de **Bhileog 11.3(C): Na réimíreanna 'ró-' agus 'an-'** do gach duine sa rang.
- Iarr orthu an bhileog a líonadh isteach leis an bhfoirm cheart den aidiacht i ngach cás.
- Ceartaigh an gníomhaíocht nuair a bheidh siad réidh.



Gníomhaíocht 11.3(D): Gramadach: Ainmfhocal agus aidiacht

Réamhullmhúchán:

- Déan cóip de **Bhileog 11.3(D): Gramadach** chun cur ar an osteilgeoir agus cóip le dáileadh ar na foghlaimoirí.

Gníomhaíocht:

- Cuir i gcuimhne do na foghlaimoirí go bhfuil ainmfhocail bhaininsneacha agus fhirinsneacha sa Ghaeilge.
- Cuir ceist orthu cad is cuimhin leo faoi ainmfhocail fhirinsneacha ó **Thopaic 9: Bia agus Deochanna**. An féidir leo liosta focal baininsneach a bhaineann le bia/deoch a thabhairt duit?
- Abair leo anois go gcaithfidh an aidiacht réiteach leis an ainmfhocal.
- Taispeáin **Bileog 11.3(D)** don rang.
- Léigh amach na samplaí den ainmfhocal agus aidiacht san uatha.
- Féach an bhfuil an rang in ann an riail a oibriú amach.
- Bíonn séimhiú ar an aidiacht nuair a thagann sé tar éis ainmfhocal uatha atá baininsneach.
- Léigh amach na samplaí den ainmfhocal agus aidiacht san iolra.
- Féach an bhfuil an rang in ann an riail a oibriú amach.
- San iolra cuirtear '*a*' nó '*e*' leis an aidiacht, ag brath ar litriú/fuaimniú na haidiachta. (Caol le caol agus leathan le leathan).
- Déan cleachtadh ar na hainmfhocail agus aidiachtaí. Abair na cinn atá ar an mbileog do na foghlaimoirí.
- Abair leis na rang go mbeidh sé níos fusa cuimhneamh ar an riail/na rialacha má

- tá roinnt samplaí den sórt seo foghlamtha de ghlanmheabhair acu.
- Tabhair cóip de **Bhileog 11.3(D): Gramadach** do gach duine de na foghlaimeoirí.



Gníomhaíocht 11.3(E): Aidiachtaí agus ainmfhocail: Scríbhneoireacht

Gníomhaíocht:

- Tabhair cóip de **Bhileog 11.3(E): Aidiachtaí agus ainmfhocail** do gach duine de na foghlaimeoirí.
- Ba cheart dóibh an leagan ceart de gach aidiacht a scríobh isteach i ngach
- Ceartaigh an gníomhaíocht nuair a bheidh an rang réidh.

11.4 Ag lorg agus ag tabhairt tuairimí faoi éadaí

(A) Cuir i gcuimhne don rang conas tuairim duine a lorg:

An maith leat an sciorta seo?

- Cuir i gcuimhne don rang conas tuairim a thabhairt. (Féach 11.3 thuas).
- Cuir leis sin anois:

Is maith liom go mór é.

Ní maith liom in aon chor é. (Nó: Ní maith liom é ar chor ar bith).



Gníomhaíocht 11.4(A): Ag cur síos ar éadaí na ndaoine sa phictiúr : Caint

Réamhullmhúchán:

- Cruthaigh póstaer trí phictiúir oiriúnacha de dhaoine gléasta go suimiúil a ghearradh amach as irisleabhair ar nós *VIP* nó *Hello* agus uimhreacha a chur leo. Cuir an póstaer ar an bhalla chun gur féidir le gach duine de na foghlaimeoirí é a fheiceáil.

Gníomhaíocht:

- Iarr ar an rang cur síos a dhéanamh ar a bhfuil á chaitheamh ag na daoine sa phóstaer. Mar shampla:

Lorraine: *Tá gúna gearr, dearg uirthi agus bróga arda, dubha.*

Donncha: *Tá seaicéad agus bríste dubh air agus léine bhán agus araile.*

- Faigh tuairimí daoine éagsúla faoi na héadaí céanna féachaint an bhfuil siad ar fad ar aon tuairim lena chéile! Mar shampla:

Múinteoir: *An maith leat sciorta Lorraine?*

Foghlaimeoir 1: *Tá sé ceart go leor.*

Foghlaimeoir 2: *Ní maith liom é.*

Foghlaimoir 3: *Is maith liom go mór é.*



Gníomhaíocht 11.4(B): Foghraíocht: Dul siar ar ‘s’ leathan agus ‘s’ caol:
Cluastuiscint

Réamhullmhúchán:

- Déan cóip de **Bhileog 11.4(B): Foghraíocht** do gach duine sa rang.
- Abair leis an rang éisteacht leis an nguth ar an DD ag rá roinnt focal a bhfuil ‘s’ iontu.

Gníomhaíocht:

- Caithfidh an foghlaimoir an focal a chloiseann sé/sí a scríobh faoin teideal ceart: ‘s’ leathan nó ‘s’ caol.
- Ceartaigh an gníomhaíocht nuair a bheidh an rang réidh.

11.5 Ag déanamh idirdhealaithe idir earraí éagsúla

(A) An difear idir ‘seo’ agus ‘sin’

- Míniú an difríocht idir ‘seo’ agus ‘sin’ trí mhéar a shíneadh ar rudaí gar duit agus rudaí i bhfad uait:

Léigi an leabhar seo agus an leabhar sin.

Féachaigí ar an bpictiúr seo agus ar an bpictiúr sin, agus araile.

- Múin an cheist agus an freagra:

Cé acu ceann is maith leat?

An ceann seo/ An ceann sin.

11.6 Ag fiafraí faoi chostas agus ag tabhairt eolais faoi chostas

(A) Costas

- Déan athchleachtadh leis an rang ar chomhaireamh ó €1 go €10. (Féach **Topaic 9: Bia agus Deochanna**)
- Múin ó €20 go €100 don rang:

fiche euro, tríocha euro, daichead euro céad euro.

- Múin an nath ‘*nócha naoi cent*’ don rang agus cuir i gcúimhne dóibh ‘*caoga cent*’. (Féach **Topaic 9: Bia agus Deochanna**)
- Cuir i gcúimhne don rang conas ceist a chur faoi chostas. (Féach **Topaic 9: Bia agus Deochanna**)



Gníomhaíocht 11.6(C): Ailín agus Pól ag siopadóireacht: Cluastuiscint

Réamhullmhúchán:

- Tabhair cóip de **Bhileog 11.6(C): Ailín agus Pól ag siopadóireacht** do gach duine sa rang.

Gníomhaíocht:

- Iarr ar an rang éisteacht le hAilín agus Pól agus tic a chur sna boscaí cuí chun a dtuairimí a chur in iúl i ngach cás.
- Ceartaigh an gníomhaíocht nuair a bheidh an rang réidh.



Gníomhaíocht 11.6(D): Agallaimh réamhdhéanta: Cleachtadh cainte

Réamhullmhúchán:

- Tabhair cóip de **Bhileog 11.6(D)** do gach duine sa rang.
- Cuir na foghlaimeoirí ag obair i ngrúpaí beirte, A agus B; A an cúntóir siopa, B an custaiméir.

Gníomhaíocht:

- Ba cheart do na foghlaimeoirí cleachtadh a dhéanamh ar a rólanna sna hagallaimh réamhdhéanta.
- Nuair a bheidh siad críochnaithe, bogadh A deiseal chun cleachtadh leis an gcéad B eile sa ról céanna.
- Ansin, ba cheart dóibh rólanna a mhalartú, B an cúntóir siopa, A an custaiméir.
- Ba cheart dóibh leanúint ar aghaidh ag cleachtadh go dtí go bhfuil siad eolach go maith ar a bhfuil de nathanna sna hagallaimh.



Gníomhaíocht 11.6(E): Foghraíocht: Súil siar ar ‘o’ v. ‘ó’: Cluastuiscint agus Scríbhneoireacht

Gníomhaíocht:

- Tabhair cóip de **Bhileog 11.6(E): Foghraíocht** do gach duine sa rang. Abair leis an rang éisteacht go cúramach leis an nguth ar an DD agus ‘o’ nó ‘ó’ a scríobh isteach sa bhearna i gcás gach focail.



Gníomhaíocht 11.6(F): Foghraíocht: ‘e’ v ‘é’: Cluastuiscint

Gníomhaíocht:

- Abair leis an rang éisteacht go cúramach leis an nguth ar an DD nó is féidir leat féin na focail sa liosta thíos a rá.

1.	te	le	Eithne	eile	bríste	páiste
2.	é	éadaí	léine	éadrom	cé mhéad	léine
3.	te	le	Eithne	eile	bríste	páiste

4. é éadaí léine éadrom cé mhéad léine

- Abair leo aithris a dhéanamh ar an nguth/ort féin.

© OÉ Má Nuad